



BRINK'S
DASAR PERLINDUNGAN DATA
GLOBAL

ISIKANDUNGAN

A. TUJUAN.....	3
B. SKOP.....	4
C. PEMATUHAN.....	4
D. ISTILAH/PERANAN & DEFINISI.....	5
E. PEGAWAI PERLINDUNGAN DATA.....	6
F. PRINSIP PERLINDUNGAN DATA	
F.1 KESAHAN, KEADILAN, DAN KETELUSAN.....	7
F.2 BATASAN TUJUAN.....	8
F.3 PEMINIMUMAN DATA.....	8
F.4 KETEPATAN.....	8
F.5 BATASAN PENYIMPANAN.....	8
F.6 MELINDUNGI DATA PERIBADI.....	9
F.7 BATASAN PEMINDAHAN.....	10
F.8 MELAPORKAN PELANGGARAN DATA PERIBADI.....	10
F.9 HAK DAN PERMINTAAN SUBJEK DATA.....	11
G. KEBERTANGGUNGJAWABAN.....	12
H. SEMAKAN TAHUNAN.....	12

A. TUJUAN

Seperti yang dinyatakan dalam Kod Etika Brink's, Syarikat Brink's, termasuk sekutu dan anak syarikatnya, komited untuk melindungi privasi dan keselamatan pelanggan, pembekal, pekerja dan pihak ketiga yang lain.

Dasar ini menetapkan prinsip perlindungan data utama yang mengawal Pemrosesan Data Peribadi* oleh semua Entiti Brink's ("Prinsip").

Dasar ini bertujuan untuk menggalakkan budaya dan amalan yang memberikan tumpuan pada perlindungan data di Brink's yang direka untuk melindungi Data Peribadi yang Diproses dalam konteks kegiatan Brink's selaras dengan undang-undang yang berkenaan.

* Istilah dengan huruf besar atau akronim yang digunakan dalam Dasar ini mempunyai maksud yang dinyatakan di halaman "Istilah/Peranan dan Definisi".



B. SKOP

Dasar ini terpakai untuk semua jenis perniagaan Brink's dan Entiti Brink's selaras dengan peraturan pembuat keputusan masing-masing. Ia merangkumi semua Data Peribadi yang Diproses oleh Brink's, tanpa mengira media data tersebut disimpan, dan mungkin berkaitan dengan pekerja, pelanggan atau orang hubungan pembekal, pemegang saham, pengguna laman web atau mana-mana individu lain, pada masa akan datang, masa lalu atau sekarang.

Dasar ini dibuat untuk digunakan secara global tetapi tidak mengatasi undang-undang atau peraturan perlindungan data yang berkenaan di negara Brink's beroperasi. Negara tertentu mungkin mempunyai undang-undang dan peraturan perlindungan data yang mengenakan kewajipan tambahan atau prinsip panduan di luar daripada yang ditetapkan dalam Dasar ini. Untuk mematuhi keperluan tambahan dan yang pelbagai ini, Brink's mungkin membuat variasi tempatan bagi Dasar ini ("Sub Dasar"), seperti Dasar Perlindungan Data Eropah untuk pelaksanaan Dasar di Kawasan Ekonomi Eropah dan United Kingdom.

Sub Dasar ini mungkin dipaparkan di Intranet tempatan Brink's yang berkaitan atau disediakan atas permintaan kepada DPO, Wakil Undang-Undang atau Sumber Manusia tempatan. Sub Dasar ini bertujuan untuk melengkapkan Dasar. Sekiranya terdapat konflik antara Dasar dan mana-mana Sub Dasar, Sub Dasar akan mengawal operasi atau kegiatan Pemrosesan Brink's di wilayah yang dilindungi oleh Sub Dasar.

C. PEMATUHAN

Semua Kakitangan Brink's mesti membaca, memahami, dan mematuhi Dasar ini semasa Memproses Data Peribadi bagi pihak Brink's. Pematuhan kepada Dasar ini dan semua Dokumentasi Pelaksanaan adalah wajib. Sebarang pelanggaran terhadap Dasar ini boleh menyebabkan tindakan disiplin bagi individu yang terlibat mengikut undang-undang dan hukuman kewangan yang besar bagi Brink's.



D. ISTILAH/PERANAN & DEFINISI

Entiti Brink's: Syarikat Brink's atau mana-mana anak syarikatnya.

Kakitangan Brink's: semua pekerja, kontraktor, pengarah dan anggota Brink's.

Pegawai Perlindungan Data (DPO): individu atau pasukan yang bertanggungjawab untuk memantau pematuhan perlindungan data Brink's dan dilantik secara rasmi.

Subjek Data: individu yang dikenal pasti atau boleh dikenal pasti tentang pihak yang kami Proses Data Peribadinya. Subjek Data boleh jadi warganegara atau penduduk mana-mana negara dan mempunyai hak undang-undang berkenaan Data Peribadi mereka.

Dokumentasi Pelaksanaan: Dasar, prosedur operasi, proses atau panduan Brink's yang berkaitan dengan Dasar ini dan direka untuk melindungi Data Peribadi.

Data Peribadi: sebarang maklumat (1) yang berkaitan dengan individu yang dikenal pasti atau boleh dikenal pasti atau (2) yang mengenal pasti, berkaitan, menggambarkan, wajar dikaitkan dengan, atau boleh dihubungkan dengan wajar, secara langsung atau tidak langsung, dengan individu atau isi rumah tertentu. Ini merangkumi maklumat yang berkaitan dengan individu yang dapat kami kenali (secara langsung atau tidak langsung) daripada data itu sendiri atau kombinasi dengan pengecam lain yang kami miliki atau boleh diakses dengan munasabah, khususnya pengecam seperti nama, nombor pengenalan, data lokasi, pengecam dalam talian, atau satu atau lebih faktor yang khusus kepada fizikal, fisiologi, genetik, mental, ekonomi, budaya atau identiti sosial Subjek Data tersebut. Data Peribadi tidak termasuk data tanpa nama atau data yang identiti individunya telah dipadamkan secara kekal.

Pelanggaran Data Peribadi: sebarang akses tanpa kebenaran atau tidak sengaja yang sebenar atau disyaki secara wajar atau kehilangan, penggunaan, pengubahan, pemusnahan, pemerolehan atau pendedahan Data Peribadi, yang dipindahkan, disimpan ataupun diproses oleh Brink's atau penyedia perkhidmatannya.

Notis Privasi (juga dirujuk sebagai Notis Privasi yang Adil) atau Dasar Privasi: notis berasingan yang menetapkan maklumat yang mungkin diberikan kepada Subjek Data apabila Brink's mengumpulkan Data Peribadi mereka.

Pemprosesan atau Proses: sebarang operasi atau set operasi yang dilakukan pada Data Peribadi atau set Data Peribadi, sama ada secara automatik atau tidak, seperti pengumpulan, rakaman, pengurusan, penstrukturan, penyimpanan, penyesuaian atau pengubahan, pengambilan, perundingan, penggunaan, pendedahan melalui penghantaran atau pemindahan kepada pihak ketiga, penyebaran ataupun menyediakan, penjajaran atau gabungan, pembatasan, pemadaman atau pemusnahan.

Penyamaran atau Samaran: menggantikan maklumat yang secara langsung atau tidak langsung mengenal pasti individu dengan satu atau lebih pengecam tiruan atau nama samaran supaya orang tersebut, bagi mereka yang berkaitan dengan data itu, tidak dapat dikenal pasti tanpa menggunakan maklumat tambahan yang akan disimpan secara berasingan dan selamat.

Pemindahan: sebarang operasi atau set operasi yang menyokong komunikasi, salinan atau pergerakan Data Peribadi menggunakan rangkaian atau mana-mana media lain, sejauh mana Data Peribadi tersebut bertujuan untuk Diproses oleh pihak ketiga yang menerimanya. Capaian jauh kepada Data Peribadi ialah satu contoh Pemindahan.

E. PEGAWAI PERLINDUNGAN DATA

Sekiranya wajar, Brink's telah melantik Pegawai Perlindungan Data (DPO).

Sila hubungi DPO Brink's atau Jabatan Undang-undang Brink's untuk sebarang persoalan berkenaan Dasar ini atau sebarang kebimbangan bahawa Dasar ini tidak dipatuhi. Khususnya, hubungi DPO atau Jabatan Undang-undang Brink's dalam keadaan yang sesuai seperti berikut:

- Jika anda tidak pasti sama ada Data Peribadi Diproses secara sah mengikut undang-undang yang berkenaan;
- jika anda memerlukan bantuan untuk mendapatkan persetujuan Subjek Data untuk Memproses Data Peribadi secara sah mengikut undang-undang yang berkenaan;
- Jika anda perlu mendraf Notis Privasi;
- Jika anda tidak pasti tentang tempoh untuk menyimpan Data Peribadi;
- Jika anda tidak pasti tentang keselamatan atau langkah lain yang anda perlu laksanakan untuk melindungi Data Peribadi;
- Jika terdapat Pelanggaran atau ketidakpatuhan Data Peribadi;
- Jika anda tidak pasti tujuan untuk menggunakan Pemindahan Data Peribadi ke negara lain di luar dari tempat Data Peribadi tersebut dikumpulkan;
- Jika anda memerlukan bantuan berkaitan dengan hak yang diminta oleh Subjek Data;
- Apabila anda melakukan kegiatan Pemrosesan baharu, atau mengubah yang sedia ada, yang mungkin akan memberikan kesan yang penting kepada individu, atau anda merancang untuk menggunakan Data Peribadi bagi tujuan yang berlainan daripada tujuan asal data dikumpulkan;
- Jika anda memerlukan bantuan untuk mematuhi undang-undang privasi yang berkenaan apabila melakukan kegiatan pemasaran secara langsung; atau
- Jika anda memerlukan bantuan berkenaan kontrak atau bidang lain yang berkaitan dengan berkongsi Data Peribadi dengan pihak ketiga.



F. PRINSIP PERLINDUNGAN DATA

Syarikat Brink's menjangkakan semua Entiti Brink's mematuhi undang-undang perlindungan data dan privasi yang berkenaan semasa Memproses Data Peribadi dalam konteks kegiatan mereka.

Secara umum, Brink's mengakui dan mematuhi Prinsip Perlindungan Data Peribadi seperti yang dinyatakan di bawah. Prinsip ini menggambarkan standard privasi yang terkandung dalam instrumen yang diterima di peringkat antarabangsa dan dalam undang-undang di banyak negara yang Brink's menjalankan kegiatan perniagaan. Prinsip ini hendaklah diterapkan dalam semua Pemrosesan Data Peribadi oleh Entiti Brink's dan Kakitangannya.

F.1. KESAHAN, KEADILAN DAN KETELUSAN

Data Peribadi hendaklah dikumpulkan dan Diproses dengan cara yang mematuhi undang-undang **secara** adil dan telus.

Data Peribadi tidak boleh dikumpulkan atau diperoleh melalui penipuan atau tanpa pengetahuan Subjek Data. Tertakluk **kepada** undang-undang yang berkenaan, Brink's akan memberi Subjek Data maklumat berkenaan Pemrosesan Data Peribadi mereka yang mudah diakses, ringkas, telus, mudah difahami, dan ditulis dalam bahasa yang jelas supaya Subjek Data dapat memahaminya dengan mudah. Maklumat tersebut hendaklah diberikan melalui Notis Privasi yang sewajarnya dan mengandungi (jika berkenaan) maklumat tentang (1) identiti Entiti Brink's yang Memproses Data Peribadi mereka atau pihak yang bertanggungjawab terhadap Pemrosesan tersebut, (2) sebabnya Brink's akan menggunakan Data Peribadi mereka, (3) maklumat tentang hak perlindungan data bagi Subjek Data; dan (4) sebarang maklumat tambahan yang akan membantu untuk memastikan Pemrosesan yang adil dan telus selaras dengan undang-undang berkenaan.



F.2.

BATASAN TUJUAN

Data Peribadi akan dikumpulkan untuk satu atau lebih tujuan tertentu, yang jelas dan sah dan tidak Diproses selanjutnya dengan apa-apa cara sekalipun yang tidak sesuai dengan tujuan asal data dikumpulkan. Data Peribadi tidak boleh digunakan bagi tujuan baharu, berbeza atau tidak sesuai dengan yang dinyatakan ketika data pertama kali diperoleh kecuali Subjek Data dimaklumkan tentang tujuan baharu itu dan mereka telah bersetuju dengan Pemprosesan Data Peribadi mereka bagi tujuan tersebut, jika perlu.

F.3.

PEMINIMUMAN DATA

Data Peribadi mestilah mencukupi, berkaitan dan terhad kepada perkara yang diperlukan berhubung dengan tujuan data Diproses.

Kakitangan Brink's hanya boleh Memproses Data Peribadi ketika melaksanakan tugas yang memerlukannya sahaja, **serta** harus memastikan mana-mana Data Peribadi yang dikumpulkan adalah perlu dan sesuai dengan tujuan yang dimaksudkan.

F.4.


KETEPATAN

Data Peribadi hendaklah direkodkan dengan setepat mungkin dan jika perlu, dikemas kini untuk memastikan ia memenuhi tujuan yang sah data itu Diproses.

F.5.

BATASAN PENYIMPANAN

Data Peribadi tidak boleh disimpan dalam bentuk yang memungkinkan pengenalpastian Subjek Data lebih lama daripada yang diperlukan bagi tujuan asal ia dikumpulkan. Atau untuk Pemprosesan selanjutnya mengikut undang-undang yang berkenaan.



F.6.

MELINDUNGI DATA PERIBADI

Data Peribadi hendaklah dilindungi dengan perlindungan teknikal dan organisasi sewajarnya yang direka untuk melindungi data daripada Pelanggaran Data Peribadi.

Brink's mengekalkan perlindungan yang bersesuaian dengan saiz, skop dan perniagaan kami, sumber yang ada, jumlah dan kepekaan Data Peribadi yang kami Proses sendiri atau bagi pihak lain, dan risiko yang dikenal pasti terhadap sistem dan data kami.

Ini termasuk, tanpa batasan, penggunaan penyulitan dan Penyamaran jika diperlukan. Pasukan Keselamatan Maklumat dan Pematuhan Brink's akan menguji dan menilai keberkesanan perlindungan tersebut secara berkala untuk membantu kami memastikan keselamatan Data Peribadi. Kakitangan Brink's bertanggungjawab untuk melindungi Data Peribadi yang dimiliki oleh Brink's dan mesti memastikan pematuhan terhadap perlindungan tersebut.

Sebagai sebahagian daripada perlindungan yang dilaksanakan oleh Brink's, akses kepada Data Peribadi dihadkan hanya kepada mereka yang perlu mengaksesnya untuk melaksanakan tugas mereka. Kakitangan Brink's hanya boleh berkongsi Data Peribadi yang dimiliki oleh Brink's dengan pekerja yang lain, ejen atau wakil daripada Entiti Brink's jika (1) penerima mempunyai keperluan berkaitan tugas untuk mengetahui maklumat tersebut, dan (2) berkongsi Data Peribadi mematuhi Dasar ini.

Data peribadi yang kami miliki mungkin dikongsi dengan pihak ketiga, seperti penyedia perkhidmatan kami, jika:

- mereka perlu mengetahui maklumat tersebut bagi tujuan memberikan perkhidmatan yang dikontrakkan;
- berkongsi Data Peribadi mematuhi Dasar ini dan Notis Privasi yang diberikan kepada Subjek Data dan, jika diperlukan oleh undang-undang yang berkenaan, Subjek Data telah bersetuju untuk berkongsi Data Peribadi mereka;
- semasa bertindak bagi pihak kami, pihak ketiga telah bersetuju untuk Memproses Data Peribadi hanya bagi tujuan yang ditentukan dan dipersetujui oleh Brink's, dan selaras dengan arahan Brink's; dan
- pihak ketiga telah bersetuju untuk mematuhi standard, dasar dan prosedur keselamatan data yang diperlukan dan menyediakan langkah keselamatan yang mencukupi.





F.7.

BATASAN PEMINDAHAN

Oleh sebab Brink's beroperasi di peringkat antarabangsa, Data Peribadi mungkin Dipindahkan kepada orang atau organisasi lain di negara yang berlainan daripada tempat ia dikumpulkan.

Sebarang Pemindahan Data Peribadi ke negara lain harus dilakukan dengan mematuhi undang-undang yang berkenaan dan Dasar ini. Sekiranya perlu, Brink's akan mengambil langkah yang wajar untuk memastikan penerima diberikan perlindungan data yang mencukupi seperti yang dikehendaki oleh undang-undang yang berkenaan.

F.8.

MELAPORKAN PELANGGARAN DATA PERIBADI

Brink's telah menetapkan prosedur untuk menangani Pelanggaran Data Peribadi dan akan memaklumkan Subjek Data dan/atau pengawal selia berkenaan jika diperlukan dari segi undang-undang .

Jika anda mengetahui atau mengesyaki Pelanggaran Data Peribadi telah berlaku, jangan cuba untuk menyiasat perkara itu sendiri. Segera hubungi Keselamatan Maklumat di:

ITSecurityTeam@brinksinc.com

Kesemua bukti yang berkaitan dengan Pelanggaran Data Peribadi hendaklah disimpan.

F.9.

HAK DAN PERMINTAAN SUBJEK DATA

Subjek Data mungkin mempunyai hak atau pilihan tertentu berkenaan cara Brink's mengendalikan Data Peribadi mereka.

Ini termasuk hak untuk meminta dan, jika berkenaan, mendapatkan (1) akses kepada Data Peribadi mereka, dan (2) pembetulan atau pemadaman Data Peribadi mereka, atau hak untuk membantah penggunaan Data Peribadi mereka bagi tujuan tertentu (seperti pemasaran secara langsung).

Brink's mempunyai proses tersendiri untuk menangani permintaan hak Subjek Data yang tersedia bagi mereka berdasarkan undang-undang yang ada, di samping memastikan perlindungan Data Peribadi. Brink's akan mengesahkan identiti individu yang membuat permintaan untuk mengakses Data Peribadi mereka atau untuk tindakan yang akan diambil terhadap Data Peribadi mereka. Sekiranya permintaan dibuat oleh pihak ketiga (selain Subjek Data), Kakitangan Brink's tidak akan mendedahkan Data Peribadi kepada pihak ketiga tersebut tanpa mengesahkan yang pihak ketiga tersebut diberi kuasa untuk bertindak bagi pihak Subjek Data.

Sebarang permintaan Subjek Data pekerja/pemohon pekerjaan hendaklah dikemukakan kepada Wakil Sumber Manusia/Ketua Jabatan tempatan sebaik sahaja diterima. Sebarang permintaan Subjek Data pelanggan hendaklah dikemukakan kepada Wakil Perniagaan/Sokongan Pelanggan tempatan sebaik sahaja diterima.

Wakil Sumber Manusia dan Perniagaan akan memaklumkan DPO (atau yang dilantik) berkenaan sebarang permintaan Subjek Data dan tindakan yang dilakukan untuk menanganinya.




G. KEBERTANGGUNGJAWABAN

Setiap Entiti Brink's bertanggungjawab untuk melaksanakan Dasar ini dalam bidang kegiatannya selaras dengan undang-undang berkaitan. Entiti Brink's akan mengekalkan langkah-langkah teknikal dan organisasi yang sesuai dengan cara yang berkesan untuk memastikan pematuhan terhadap Prinsip yang ditetapkan dalam Dasar ini, termasuk langkah-langkah untuk menyekat dan memantau akses kepada Data Peribadi, kerap melatih kakitangan Brink's berkenaan Dasar ini, Dokumentasi Pelaksanaan dan sebarang langkah privasi dan keselamatan lain yang berkaitan, dan menetapkan amalan perlindungan data yang praktikal dan/atau diperlukan dalam keadaan tersebut.

Brink's akan sentiasa menguji langkah-langkah privasi yang dilaksanakan untuk memastikan penggunaan dan perlindungan Data Peribadi yang betul.

H. SEMAKAN TAHUNAN

Brink's berhak untuk mengubah Dasar ini pada bila-bila masa. DPO Global Brink's akan memantau dan menilai secara berkala Dasar ini untuk memastikannya mematuhi undang-undang yang berkenaan. Walau apa pun yang disebutkan di atas, Dasar ini akan disemak secara rasmi dan dikemas kini dengan sewajarnya sekurang-kurangnya sekali setiap tahun oleh DPO Global Brink's. Sekiranya Dasar ini memerlukan perubahan disebabkan oleh pengawalseliaan atau keperluan lainnya, Dasar ini akan segera dipinda untuk mencerminkan perubahan tersebut.



.....

Sila kunjungi Intranet Undang-undang Global dan bahagian Perlindungan Data untuk mendapatkan sumber dan butiran hubungan:

<https://customerportal.brinksinc.com/en/web/brinks-resource-library/global-legal>

.....